

山右石刻叢編



三靈侯者通

三元真君之別號也本亦人靈蓋得道之

尤精者也積救厄扶危之行已滿人間布愛民及物之恩終  
歸天上鎮非災閉目以安眠伏橫禍藏眸而穩睡千妖殄滅  
五瘟消潛人能敬於神神能福於人敬福交歸莫知其極矣  
茲者古左邑之東去縣積有三十里通衢之貫有聚落日東  
鎮城北上社居民數十家夏農圃工賈為業其邑人張清張  
千戶姬安撫衛德用張林劉提控聚席而言曰自

大朝撫定之後人煙雜居不獨親其親而四海皆親不若結  
香火之親緣崇 三靈之廟貌流鶩薦福之基永祝

君王之壽不亦宜乎一唱百和遂於驛途之側卜墜一規斷  
瓦礫而夷之芟荆杞而垣之植花木而秀之穿井泉而圃之  
棟宇簷楹具儀掾吏道舍庖廚經之營之迄今伍載創然一

新稍有次序欲訪幽人寂士主而居之幸遇道流杖屨而聖  
詰其所以姓楊諱志真慶陽人氏自壯歲弃家入道夏西京  
玉陽觀何大師為引度今歆卜終焉之計衆遂默議曰侶有  
道緣遂具狀疏敦請楊公住持此廟及作養<sub>玄</sub>仙館永為主  
宰楊公徘徊四顧山川明媚如列畫圖西北積千峯之翠色  
東南瞰萬頃之澄湖心與緣會惠然而應迺□□公□與同  
心協力裁高補下平夷園院手足胼胝忝然疲役不憚艱苦  
今已落成一方士庶歲時祈禱得以拈香致福優游於其間  
矣豈不偉哉衆或乃言曰然此福地若無銘碣時更代革湮  
沒無聞駕強梁者侵斂而居之則徒勞昔日剏建之功也是  
以登途涉水致禮捧觴丐為一記刊於真珉用傳永久子堅  
辭再四弗獲其免遂搜刮肝腸強為鄙語曰紀其始末云耳

中統四年歲次癸亥二月壬子朔寅生五葉日記

功德主張清張千戶本廟住持修真道士楊志真等清明  
日立石

⑤門正派掌教大宗師至德誠明真人張

本鎮石匠張德琳刊

按聞喜縣志三靈侯廟在城東東鎮縣志元三靈侯廟碑  
中統四年在上鎮卽此碑碑題洞霞丐叟昌黎裔志謹撰  
并書丹篆額元定宗元年聞喜長春觀記碑亦題昌黎裔  
志謹書則固元初能書者碑言三靈侯者三元真君之別  
號按元三教搜神記上元一品天官賜福紫微帝君中元  
號二品地官赦罪青靈帝君下元三品水官解厄賜谷帝  
君又云古左邑之東去縣積三十里通衢之會有聚落曰  
東鎮城北上社與縣志村莊上東鎮距縣三十里合今由

曲沃侯馬驛至聞喜涑川驛者必逕東鎮所謂通衢之會  
碑云張千戶姬安撫劉提控者皆舉其官洞霞丐叟昌黎  
裔志謹卽洞霞觀碑之景雲宮觀太師韓志謹塔察爾以  
遺宅畀之賜額曰洞霞者碑見通志金石記

### 重修道紀堂碑

碑連額高二尺六寸廣一尺七寸二十一行  
行二十六字額題六字均正書今在陽城縣

### 重修道紀堂記

提舉澤州勸農事張賢輔撰

### 後進土石麟書

夫道有升降物有廢興皆其時也然則道之弘物之成何嘗  
不在於人乎太清觀道紀堂厥初藏法堂也經始於大金泰  
和二季壬戌逮今六十餘載風雨所侵隳廢殆盡無一人刮

目者幸有本縣商酒務監使張翊天翔與其弟仲賢天瑞共圖起廢而未敢自擅乃具其事資稟於父父亦樂為之於是庀工募役竭力輸財變汚以潔易故而新其用簡其力速矣然而美無愧於初噫或興或廢果其時邪人與時會豈偶然邪且堂之復興也非徒示耳目之美將以修齋行道拜表啓⑤散花賦水步虛華夏儀鸞而引鳳於此者固不偉歟此重修之意也堂之基址舊未墁砌公乃始終其事上下一新無遺恨矣一日勸緣道士趙仲溫會眾而落之索子紀其事將刻諸石俾人人共知為善者有光於後也予自揣淺識難以措意再四固辭終弗獲免姑以所見實事而直書之文竢後之能者本觀營建始末其詳具見於前碑言之則幾於贅爾

甯中統五年甲子秋七月中元日記

都功德主商酒務官張光著燦然同長男翊次男仲賢  
提點本縣教門事賜紫沖虛大師董知微

樞鑒救苦天尊功德主獲嘉縣朝元觀韓志堅

助緣道士王志明王志靜袁志堅李志榮

本觀道士王處仁路德童王元童

知觀道士趙仲溫勸緣立石

砌底匠關祐酒(酒)王恩

石匠澤州張道清同男贊刊

按澤州府志陽城太清觀在懷古坊舊爲元辰殿大定五  
年敕賜今額十一年道士李洞雲建又陽城縣志舊有閣  
高四十丈道士李洞雲所作李俊民爲記道會司居之按  
此記爲太清觀重修道紀堂而作碑題提舉澤州勸農事



張賢輔撰後進士石麟書賢輔見鳳臺縣志元提舉澤州  
勸農事官與碑合麟見通志貢舉譜元鄉貢進士陵川人  
以記文考之蓋本縣商酒務監使張翊與其弟仲賢謀興  
復此觀具事資稟於父主商酒務張光著庀工募役既成  
道士趙仲溫索賢輔紀之所言本觀營建始末具詳於前  
碑者卽金李俊民所著太清觀記又碑末題提點教門事  
諸銜亦足爲元代崇道教之證

嘗穀臺碑

碑高二尺二寸廣一尺二寸二行行四字  
字徑五寸許正書今在隰州東北四十里

神農黃帝嘗穀之臺

碑陰

陰額題四字下分  
十行行字不等

隰州屬官

知廟事前道正劉志弘 鄉正孫永昌酒監晉昇馮瑞

庫使曹居仁

前提控捕盜劉希晏 學正李師顏 進士李璋

隰川縣尹劉謙 縣尉吉英 典史賀太師口

宣差達魯花赤脫朶

宣差州尹杜思明

提控案牘官呂鳳 都目甘霖 孔目官路才

司吏譚字王字劉洛曹隨李侃曹規牛祥

至元二年乙丑冬十月望日立石

前隰州軍判高鴻書 龍泉處士馮興刊

兩側

側厚六寸六分一上題三字一上題二字下刻二行

施地人 賀用賀二高文仲賀四

廟地 東至賀用高文仲南至高文仲賀二西北至賀用賀二

按隰州志合桑村嘗穀臺有元碑上刻欽差官道正劉志宏鄉正孫永昌酒監晉昇馮瑞云云皆與此碑合今刊本州志劉志下無宏字庫使曹居仁作庫徒皆當以碑爲正又碑拓本曹居仁下有提控捕盜劉希晏州志無餘如學正李師顏進士李璋隰川縣尹劉謙縣尉吉英宣差達魯花赤脫樂宣差州尹杜思明提控案牘官呂鳳都目甘霖孔目官路才則州志與碑本悉同元史杜豐傳子思明平遙縣志杜思敬故明威將軍吉州路達魯花赤杜公碑思

明字彥昭襲爵充沁州管民長官中統新法肇立

姚樞傳中統四年

罷侯

例遷隰陝鄧三州刺史悉有能聲至元丙子丞相

伯顏渡江伐宋奏請能幹官十員所下城邑俾之鎮撫思

明與焉俾攻陽邏堡思明先登克之寵錫虎符授吉州路

總管達魯花赤請告歸卒於家沁州志略同所云中統新

法立思明例遷隰與此碑宣差州尹合

碑立至元二年十月思明時猶尹隰

末題至元二年冬十月望日立石前隰州軍判高鴻書龍

泉處士馮興刊高鴻見至元十二年霍州杜莊碑爲霍邑

縣尹太平寰宇記隰州隰川縣龍泉故郡城在縣東一百

三十步周龍泉郡也興題龍泉者卽州人

元隰州治隰川縣明省入州

碑見通志金石記

管州周公記

石高一尺二寸七分廣一尺四寸九分三  
十行石已漫漶字數難稽今在靜樂縣

管州知州周公記

原夫管州者乃古異分口之口春秋時

闕下

政和中賜郡号汾源

闕下

大元安撫已定省傷散

闕下

任以來口府知州周美

闕下

口路總管至元二年

闕下

聖朝侍受

闕下

宣命知府周公

闕下

克副元師

闕下

宣命授武略諸軍

闕下

宣命口州

闕下

錢

樓

宣慰使

口

朝廷

恩綸迂克

宣命授明威

太原復

朝廷區處

咸願刻石以彰

糾首任

稅務官

前權州

高鎮

□□

關

屬吏

□□□□

□東文

賈

關

吏目金鐸

□□□□

溫德

關

前巡檢

關

將仕郎管

關

承直郎管州知州

關

武略將軍管州達魯

關

按今揭本多磨泐有云政和中賜郡號汾源者宋史地理志憲州中汾源郡軍事初治樓煩咸平五年移治靜樂軍縣遂廢軍又廢樓煩改隸嵐州熙甯三年廢憲州以靜樂縣隸嵐州十年復憲州仍領靜樂縣政和五年賜郡名碑云政和中賜郡號汾源以史證之則政和五年也碑闕何

年刻有知州周美又有闕路總管至元二年文則立碑必

至元中

月公普救寺二疏

石高一尺五寸廣二尺六寸五分第一疏十七行第二疏十八行行均二十一字正書今在永濟縣

河解達魯花赤管民官疏

敦請

月公長老住持十方普救禪寺為

國焚修祝延

皇帝聖壽萬安者

伏以曹溪大振馬駒踏殺天下人臨濟溢光瞻駟滅却正法  
眼今豈無聞于世古來貴得其傳欲施本分鈴鎚須賴作家  
手段恭惟



月公長老少孕詩書之窟壯芳芝慧之門慣捋虎鬚而馳掣  
電之機輪真獅子兒乃具笑花之眼孔棒頭喝下不涉麤纖  
禪板蒲團坦然明白再詠舜都之風月重眸太華之煙蘿借  
老瞿曇寶塔之因緣祝

聖天子 金輪之永曜幸毋謙遜慰此慇懃謹疏

至元三年正月 日疏

宣差河解萬戶管民官徐澄

宣差河解達魯花赤都功德主

河中府疏

章疏札請

月公長老和尚住持十方普救禪寺為

國焚修祝延

皇帝聖壽無窮者

伏以舉揚宗旨全憑具眼高流建大法幢必仗英靈上土恭  
惟

月公長老派源臨濟法嗣雲松施妙用而不許商量運大機  
而安容擬議直是棲心丹嶂曷若垂手紅塵續如來不焰之  
燈作普救重光之運竭誠三請俯賜一音來拈西祖之心香  
用祝

南山之聖壽謹疏

至元三年正月 日疏

宣差河中府判官段紹隆

宣差河中府同知石抹飛雄

宣差河中府功德主奧屯希愷

監寺智寶

維那福順

典座

宗顯宗性

直歲道敬

權住持庵主了冲

講主普潤立石

按碑刻二疏皆爲請僧月公住持普救寺而作元時尊禮  
僧釋意在祝延聖壽此碑祝聖天子金輪之永曜及南山  
之聖壽云云可見世祖本紀至元三年四月庚午敕僧道  
祈福於中都寺觀以僧機居慶壽寺亦其證也二疏末皆  
刻至元三年正月日疏所刻銜有河解萬戶管民官徐澄  
河解達魯花赤都功德主闕元史地理志河中府憲宗在  
潛置河解萬戶府領河解二州河中府領錄事司及河東  
臨晉虞鄉猗氏萬泉河津滎河七縣至元三年省虞鄉入  
臨晉省萬泉入猗氏併錄事司入河東罷萬戶府而河中  
府仍領解州八年割解州直隸平陽路元史本紀至元二

年六月丁卯以姚樞行省事於西京平陽太原詔諸路郡  
戶不滿千者可併則併河解萬戶府爲樞所廢無疑碑題  
至元三年正月此河解萬戶府廢在是月後之證河中府  
疏後題銜河中府判官段紹隆河中府同知石抹飛雄河  
中知府功德主奧屯希愷按紹隆自澤州長官遷沁州再  
徙河中判官授同知晉州進知葭州調台州復知通州卒  
清苑郭文憲貫銘其墓見鳳臺縣志希愷與屯世英子見  
元史傳元史至元二年二月甲子定蒙古人充諸路達魯  
花赤漢人充總管回鶻人充同知永如制元史類編引典  
章云凡文案一  
同判行印信聽達魯  
花赤封識長官收掌此碑有達魯花赤知府同知等官河  
中爲散府無總管碑立至元三年正在二年定制後而同  
知石抹飛雄則契丹之姓或非回鶻也

汾東王廟記

碑高五尺二寸廣二尺一寸二十一  
行行六十字正書今在太原縣晉祠

重修汾東王廟記

宣授太原路提舉學校官戈穀撰

中書省左右司員外郎馮表書丹

宣差五路萬戶府叅議田伯英篆額

書曰望秩于山川祀之有品秩所以報功崇德正人心寔國  
家之大事聖王之所重也是以天子然後祀天地諸侯則各  
祀其境內山川百神聖陵墳衍及聖賢之嘗有功有德於民  
者故五嶽牲禮視三公四瀆視諸侯其餘視伯子男其或品  
秩之不明尊卑之雜糅則雖粢盛豐潔牲牷肥腍神其饗之  
乎王始封為唐子變更國號為晉文王之孫武王之子成王

之母弟生有手文之徵幼承剪桐之封蓋天啟之也故箕子  
曰唐叔之後必大歷世四十歷年六百其間賢智之君繼作  
如文侯之復東周文公之霸諸侯獻襄之啓土平悼之好德  
所以藩屏王室澤潤生民者不為不多則其奕世之血食於  
此邦也宜矣古無原廟制今王之祠於此者意其後世子孫  
以國號因晉水而為之耶抑邦人思其道恩餘烈而為之耶  
按晉陽志載魏書地形志云晉陽有晉王祠然則王祠之在  
此其來遠矣自晉天福六年封興安王迨宋天聖後改封於  
東王又復建女郎祠於水源之西東向熙寧中始加昭濟聖  
母號則其品秩既明矣王殿南百餘步為三門又南二百步  
許為景清門門之外東折數十步合南北驛路則廟之制又  
甚雄且壯矣居民利其出入之便又當聖母殿開道而東置

三門爲王之祠日就頽圯而弗脩祀事廢墜而弗舉因循逮於兵後累政惟求山水遊觀之樂而向之尊王之意邈不知省可勝歎哉總管李公由山西南路宣慰使承

持旨來殿是邦牒訴之餘講明典禮脩舉百神之祀如李晉王狄梁公墓臺貽狐突寶鳴犢諸廟悉爲完護以謂王之廟制尤甚委靡而特爲釐正之禮也加之中書右丞張君勉以興滯補弊之語適與公意合遂敦請道者班公守中住持以圖完復之漸即以其事具奏

天子嘉其意特降優詔俾加營護仍諸路掌教真人張公以劄付令提點廟事先是殿宇摧毀神位迫窄廢壞皆補完而更新之內外列以官侍卿大夫武衛如王者儀又創寢殿於其後多植松栢里人化之樂助用者惟恐其後又志書載水

經注云昔智伯遇水以灌晉陽後人因之蓄以為沼沼西際  
山枕水為祠齊天保中大起樓觀祠西山上有望川亭祠中  
兩泉北名善利南名難老皆作亭以庇之祠南大池西岸有  
流盂池池上曰均福堂堂後曰仁智軒其南曰湧雪亭池中  
島上曰清華堂亭曰環翠邦人歲時行樂者甚夥儲香火之  
資以為祠中補葺費然則景清門之北所為遊觀之所者甚  
麗且幽敞矣今王殿之外雖未能盡如舊制誠能續承公意  
營葺不已足為他日完復張本一日公語僕曰廟制之舉略  
見端緒將文諸石以誌其梗槩使人不忘前賢之功德知祀  
事之有品秩尊卑之不可雜糅則聊以明典禮正人心以為  
風化之本僕曰此固有益於人者多矣敢不承命遂摺拾前  
說之可考者而粗書之至元丁卯歲孟秋朔日汝陽戈穀載



拜謹記

校碑題宣授太原路提舉學校官戈穀撰中書左右司員外郎馮表書丹宣差五路萬戶府參議官田伯英篆額元

遺山集臨海戈公升表

系出臨海占籍汝州之梁縣

子男三人長穀英

事程內翰天益末冠爲鄉府所薦再赴簾試文學行義高

出時輩以功授本州防禦使

通志金石記沁州長官杜豐記撰文之戈穀英碑書爲戈

穀蓋出仕時省一字選舉志中統二年始命置諸路提舉學校官碑立至元四年故穀得以提舉學校入銜田

伯英見王惲太平重修文廟賢廊碑至元十年爲平陽路

經歷山西通志秩祀略唐叔虞祠在太原縣西南舊通志

卽晉祠後晉天福六年封興安王宋太平興國九年旣下

河東加完繕天聖間改封汾東王元至元四年戈穀撰記

卽此碑碑云總管李公由山西兩路宣慰使來殿是邦又

中書右丞張君勉以興滯補弊以元史考之李德輝傳中  
統元年爲燕京宣撫使忤平章王文統去位三年文統以  
反誅德輝遂起爲山西宣慰使至元元年罷宣慰司授太  
原路總管帝以太原難治故以德輝爲守至郡崇學校表  
孝節勸耕桑立社倉一權度凡可以阜民者無不爲之五  
年徵爲右三部尙書德輝自宣慰除總管史與碑合碑立  
至元四年正德輝泣任張啟元中統二年十月庚子以右  
丞行中書省於平陽太原等路元史表至元二年啟元猶  
爲右丞然則所謂右丞張君者卽啟元通志以爲張德輝  
按德輝傳世祖卽位起德輝爲河東南北路宣撫使遷東  
平路宣慰使至元三年秋參議中書省事五年春擢侍御  
史未爲右丞通志誤碑立至元丁卯實至元四年又伯英

結銜五路萬戶府參議元史郝哈尙巴圖傳庚子拜宣德  
西京太原平陽延安五路萬戶戊申還治太原此五路萬  
戶府治太原之證宋子貞傳授參議東平路事爲嚴忠濟  
參議忠濟  
東平此萬戶府得有參議官之證元初官制史不詳可以  
參考得之碑見通志金石記

### 霍州學記

碑高五尺六寸四分廣二尺四寸五分  
二十一行行五十字正書今在霍州

### 霍州遷新學記

中書省差平陽路同提舉學校官劉嗣書丹并篆額

自京師至郡邑皆有學學皆有廟曰

夫子為先聖郡守邑長徧天下得曰通祀古也兵興曰來廟  
學盡廢人競於亂目不睹瑚簋之儀耳不聞絃誦之音蓋有

年矣

國朝開朔復儒生之家曰屬天下

息至渥也而四方之遠民未盡勸詒未盡息餘風避俗狃於舊而未盡移易者何哉人不知有學故也

皇帝臨御天下庶事皆有條貫越明年分置學官有司曰治道先後之不同故郡縣之學或有興與未而霍之為州又當河東南北兩道之衝在職者簿書期會之隙奔走將迎日不暇給其於學尤不易議至元二年夏四月韓侂輿來典邕郡下車按國之故謁先聖於廟廟學遺址莽為瓦礫場焉摧蹙然不寧退即公堂會同僚澈里伯高侯忙古解暨諸郡吏共商畧建立事眾謀僉同如出一口會大府曰府掾分屬諸郡曰戒不治知事喬君居敬為霍吏日始至申前議不符

而合初進士張國維營葺累年勤亦至矣未及次第而卒訪其遺材僅得三四而棟梁柱石之用尚有缺焉相學之舊庠陋狹隘不足呂揭虔妥

靈迺卜宅於舊學西北豐衍端夷其宇

神甚亘命工絕焉得地廣三十舉武其表倍差樹表定基各有攸當呂諮於故老故老罔不悅呂復於方伯方伯稱其是迺共分廩食呂濟其闕徵庸儻工人競用勦功未訖賈侯琪來代澈里伯喜事之集呂不與始謀為懽贊其成愈力歲丁卯冬十一月正室成栖

神像於中配呂顏孟十哲廟貌隆峻觀者起敬而師儒之室講肄之位其餘材猶足呂卒事迫於瓜期呂遣來者喬君呂三侯之命來謁文子呂久病為解而請益堅迺諗之曰子產

不毀鄉校於鄭訖春祫班鄭不乏人為禮義之邦文弱興學  
於蜀曰蜀之鄙夷卒之其材與鄒魯並而號稱易治子產文  
翁之政美矣使後來者繼之亦如賈侯之代於前增而築之  
恢而大之他日俊民之出禮俗之成其亦知所自矣豈不可  
曰不書至於施地施財施力者其厚薄之差具列之碑陰曰  
見霍人嚮道之漸

至元四年冬十一月既望

宣授平陽路提舉學校官段成已記

大朝至元六年歲次己巳十一月望日立石

石工馬源刊

按碑記爲平陽路同提舉學校劉嗣書丹篆額平陽路提  
舉學校段成已撰霍州志學在州治西南元至元二年學

久廢知州

原作知縣誤

韓奭卜宅於舊址西北功未竣知州

賈琪繼成之段成己記卽此碑碑云河東南北兩道者金河東南路治平陽河東北路治太原元初因金制也元文類虞集稷山段氏阡表金武威郡侯矩生三子長曰鈞生汝舟汝舟生恆恆生成己登至大進士第主宜陽簿及內附朝廷特授平陽提舉學校官不起與碑題平陽提舉學校合阡表言不起以此記與河中府廟學碑靳和碑題街宣授平陽路提舉學校官證之則成己固已受元官惟廟學碑又有前進士三字似終未赴任者與阡表不起之言尙合固與劉祁不同歟

### 眞澤廟記

碑高四尺六寸廣二尺二寸八分十九行  
行三十五字正書今在盡關縣神郊村

重修真澤廟記

祀典法施於民以勞定國能禦大菑能捍大患者祀之四方  
名山大澤林谷諸陵為邦域之望能出雲為雨生財資民者  
宜有神守之以血食其土尚矣上黨之俗質直好禮勤儉力  
穡民勇於公役怯於私闕自昔稱為易治然獨豐於事神凡  
井邑聚落之間皆有神祠歲時致享其神非伏犧神農堯舜  
禹湯則山川之望也以雩以禱先穡郵暇皆於是奔走焉歲  
正月始和農事作父老率男女數十百人會於里中祠下豐  
牲潔盛大作樂置酒三日迺罷香火相望於邑皆然至十月

農事畢迺止歲以為常壺關縣紫團山有兩女仙祠居人傳  
仙人姓樂學道此山得不死而去相与率而奉祀之靈應如  
響宋大觀中旱守臣禱之而雨請之有司得廟額曰真澤仙



人號曰冲惠冲泚大建祠宇金末寇亂風雨傾圯蓋什三四國朝至元五年魏人邳朗來守邑雩祭之請應不踰夕迺曰霈澤敷惠神明之職興滯補弊守令之事也遂約里人楊端張山丁福道士連信英輩鳩功補完之踵門謁予乞記其事予以中統三年秋七月西歸嘗道出祠下而止宿焉峻嶺峙前重阜環浚茂林鬱如內外嚴邃殿堂廊廡凡百餘間如大邦君之居信列仙之靈區神明之偉觀也特列而直書之至若仙人族世雨暘壘異具於政和誥詞縣令李元孺之刻文詳矣茲不復贅七年七月壬寅上黨朱泐記及書

邑人李澤民題額

鄉貢馮成 靳廣 丁義

典史王珍 司吏馮洛 劉甫 李珪 蓋信

主簿兼尉李

從仕郎壺關縣尹郅

達魯華赤末兒木花

木端筭立石

同修人陳□ □□ 馮德

木匠郭全 馮□

石匠王贊刊 瓦匠□□ 劉□□

按碑言壺關縣紫團山有兩女仙祠云云壺關縣志紫團山在縣東南百六十里碑云宋大觀中旱守臣禱之而雨云云見宋政和元年李元孺樂氏二真人封號記碑云至元五年魏人郅朗來守邑縣志元韓仲元重修玉皇七佛廟記至元五年洛州肥鄉縣郅公彥明來尹是邑適以比

歲浔罹蝗旱常於祠下禱請致雨蝗不爲災公移莅武安  
迨至元十六年己卯以承事郎同知潞州事据仲元記可  
得邳公仕履之概縣志名宦有邳公傳卽据仲元記碑以邳公禱應重修  
祠而立末書七年七月壬寅上黨宋渤記及書邑人李澤  
民題額潞潞城縣志至元二年李莊重修宣聖廟記結銜  
爲集賢學士嘉議大夫元史宋子貞傳子渤字齊彥有才  
名官至集賢學士碑末題銜有典史王珍主簿兼尉李從  
仕郎壺關縣尹邳達魯花赤末兒木花皆以立碑年任碑  
見通志金石記

華嚴寺明公和尚碑

碑高五尺五寸五分廣二尺七寸四  
十行行七十一字正書今在大同府

西京大華嚴寺佛日圓照明公和尚碑銘

并序

嘉議大夫宣授西京路總管兼大同府尹田介篆額

蔚州靈巖縣曲迴山寺住持嗣法松菴悟圓

卷之四

緬惟荆山之璧世稱其寶者美其無瑕也太阿之劍人賞其  
 利者貴其立斷也凡海之人而言即佛者謂其達性也未明  
 本覺認真性以為情體妄元空即凡心而了道其有幼具金  
 剛堅重內韜瑚璉奇材蘊匪席不轉之心透自肯不傳之妙  
 者余於圓照見之矣師諱慧明蔚州靈人其父李族沉信  
 佛乘賑貧濟苦其母劉氏雅量弘遠懿德昇聞因夢異人白  
 馬素衣來乞寄宿從此有娠載誕之後果異恒童相者覘之  
 乃曰此子他日必大空門非世塵中所能拘戀纔及佩觿即  
 習青衿誦練詩書傍通黃老漁獵子史綜覈篇章嘗歎曰周

孔名教未窮有一之詮莊老重⑤豈達空口之理稔聞西京  
崇⑥寺崇業大師籍甚一時譽流四表即從之落髮受滿分  
戒探賸經論陶冶真宗聽習華嚴備淹圖別未周數載幽致  
大通事理匝於一塵生佛融於當念往復千變動靜一如星  
羅心目之間珠連文句之下方悟佛教之淺淺已勝孔老之  
深深學者追崇負帙座下仍念理居文表道非語中尋文難  
以證真循指豈能識月屢聞教外別傳之旨每欣離念見佛  
之談不歷階梯徑登覺地遂決志遊方遍詢禪匠初投冲虛  
昉公次依松崑暉公退步忘懷我日切備蒙淘汰指授無遺  
雖礙膺之物已除而見覺之情未泯後抵燕之慶壽參海雲  
老師一見欣然便通入室老師左提右挈痛下鉗鎚棒喝交  
馳逆機無滯海雲一日忽問師曰臨濟三頓棒汝作麼生會

師震聲一喝海雲笑曰此子徹耶師以手掩耳超出自此情  
忘執謝更無餘惑師將辭行海雲以頌送之曰古鑑圓明洞  
然瑩徹魔佛容分虛空撲裂大用縱橫雷轟電掣宛轉無為  
不存軌轍弄拈日裏浮漚團撮爐心片雪倒騎吼月磁牛驚  
起追風石鼃咄當頭打破絕偏圓撥轉玄關奚辨別時當乙  
巳年七月望日也於是遂隱靈隱之曲迴寺荒藍廢址重興  
新之庚戌中西京忽蘭大官人府尹忽管劉公華嚴本主法  
師英公具疏敬請海雲老師住持本府大華嚴寺海雲邀師  
偕行既至雲中海雲抑師住持代攝寺任師天資粹美難違  
上命勉就住持即其年九月十五日師既主其柄厚下寬明  
勵力公清宗風大振先是德公長老攝持院門牢落庭宇荒  
涼官物人匠車甲繡女充牧寺中至是並令起之移句心處

大殿方丈厨庫堂寮朽者新之廢者興之殘者成之有同創  
建本寺藏教零落甚多或寫或補並令周足金鋪佛燭丹漆  
門楹供設儼然粹容赫煥香燈燦列鍾鼓一新非師有大因  
緣孰能如是成就也又於市面創建浴室藥局塌房及賃住  
房廊近百餘間以贖僧費洪規遠慮固以深矣壬子春今上  
皇帝未及龍飛享師名德特旨令太保聰公述疏命師陞堂  
開法永住大華嚴焉即其年六月十五日癸丑中有獨謨干  
翁主者太祖之女也權傾朝野威震一方仰師碩德加佛日  
圓照徽号焉乙卯春慶壽虛席燕京府僚及海雲疏命師主  
之凡百循規不事邊幅增完補弊修葺田園丈室蕭清門無  
俗客今上皇帝及東宮太子屢於慶壽作大法會師厭於將  
迎退歸靈隱之曲迴寺閑庭隱几終日翛然小師冲公及西

京官僚知師在彼扣門堅請荐移大華嚴寺爲怡顏永日貴  
賤一之衢罇恒盈酌而匪竭踵門造閭虛往實歸丈室未開  
而戶外之屨滿矣至元七年二月初覺有微疾遂罄捨衣資  
作大法會至六日己未日薄虞淵乃謂門人曰日色晚也即  
噉筆書偈曰這箇閑家破具知他販了幾度翻身踢倒乾城  
是處清風滿路復云驚直去咄偈畢擲筆而卧似若孰眠然  
撼之已逝矣顏色無變頂煖若生攀慕追號來往如市恨人  
天之眼滅傷苦海之舟沉閻維之際紅光亘空蕃漢瞻之嘆  
未曾有俗壽七十二僧殞四十五嗣襲法道者七人首曰昭  
冲奉旨住大慶壽寺承海雲之道爲僧門總統次日義辯住  
西京南關崇化寺次日法鍾繼住華嚴堂構先業餘者各爲  
一方法主舍利障雙五色皎然門人兩處建塔一宅於華嚴



寺之墳一窆於靈

**碑**

曲廻寺師賦性

**淳**

謹器宇恬愉臨事不

回與人謙穆陞堂演法泣衆儼然誘掖後昆綽有餘裕平生以第一義諦為人未嘗枉道以從物前後五遷大利閎龍藏一終出家門資隸名受訓者百有餘人在家士女請名稟教者亦千餘數雍雍肅肅敬法崇師上下有倫良可羨也一日慶壽總統冲公使嗣法長老月公華嚴監寺昭偉來謂余曰先師威德豈可無文誨導之恩孰敢忘却假師筆力庶可發揮刻諸貞珉冀其永久余文慚麗則學謝博聞勉力抽毫勞楊雄之五藏雕蟲小巧乏曹娥之口詞古井引泉枯梯生肆昔黃檗示滅裴相誅其功佛覺歸真蔡珪旌其德瓊編之下草綆續之嘉慶壽之孝誠美老師之鴻範義不可讓謹系以銘其詞曰

無位真人本自全昭昭出入面門前一段光明燦大千六門  
開豁獨連軒海雲法道若天懸異種曇華奪色鮮梅檀林下  
師子眠大用全滅真可傳華嚴古刹起因緣池址頽簷皆端  
研憧憧往來孰後先結秀人華佛果圓全身跳出金剛脊吞  
却楊歧栗棘丸閉門靜掃龍潛淵乘興閑遊沒底缸慶壽三  
年炕未甞葉落歸根來不言本自無生復寂然雲中日月墜  
深泉空華落影水歸源徒令後學增悲纏亭亭寶塔金玉堅  
層層無縫映荒芊破披威德幾何年磨盡蒼崖名愈宣

昔大元國至元十年歲起昭陽作噩季春月律中姑洗甲  
寅朔初六日己未巽時立

功德主昭勇大將軍西京路總管府達魯花赤禿烈禿古  
思

功德主昭勇大將軍西京路總管兼大同府尹守菩提心  
戒佛子蒙古

功德主西京路前達魯花赤守菩提心戒佛子帖木都忽  
思

紺殿內莊嚴諸供養具雲中大檀越守菩提心戒佛子悟  
圓居士高至定

本京大華嚴寺住持嗣法歸隱法鐘

提點沙門至遷監寺沙門昭昶同立石

宣授諸路釋教都總統領海雲後事大都大慶壽寺住持  
嗣法筠菴昭冲立石

雲中宋德彰刊

按碑題興平府大雲峰寺住持襲祖如意老人祥邁撰嘉

議大夫宣授西京路總管兼大同府尹田介篆額蔚州靈  
邱縣曲迴山寺住持嗣法松菴悟圓大同府志載此碑撰  
篆額書人皆與今塌本合田介見職官元至元十年大同  
總管碑言師諱慧明蔚州靈邱人誦練詩書傍通黃老漁  
獵子史綜覈篇章從西京崇元寺崇業大師落髮又云遂  
決志遊方徧詢禪匠初投沖虛昉公次依松嚴暉公後抵  
燕之慶壽參海雲老師元史憲宗紀元年辛亥夏六月帝  
卽皇帝位於鄂諾河以僧海雲掌釋教事卽碑所言之海  
雲以下文乙巳隱靈邱之曲迴寺考碑云乙巳六皇后瑪  
之則圖公之謁海雲在辛亥前碑云乙巳蔡氏稱制  
四年隱靈邱之曲迴寺庚戌中西京忽蘭大官人總管劉公  
華嚴本主法師英公具疏敬請海雲老師住持本府大華  
嚴寺元史速哥傳欽定本乙未爲山西大達魯花赤卒子

忽蘭襲職性純篤酷好佛嘗施于功劉伯林傳錄功以本職充西京留守兼兵馬副元帥子黑馬名巖壬午襲父職辛丑授都總管萬戶統西京河東陝西諸軍萬戶中統三年卒庚戌定宗后之三年則碑所謂忽蘭大官人總管劉公者卽此二人碑云旣至雲中海雲押師住持代攝寺任先是德公長老攝持院門牢落庭宇荒涼官物人匠車甲繡女充徧寺中至是並令起之移向他處按元史定宗崩諸王各部遣使燕京徵求貨財或於西域回鶻徵取珠璣於海東索取鷹鶻民力益困法度不一內外離心觀此碑人匠繡女充寺中云云可爲法度不一之證碑又云壬子春今上皇帝未及龍飛特旨令太保聰公述疏命師升堂開法永住大華嚴按壬子憲宗二年元史憲宗元年命皇

弟忽必賚領治蒙古漢地民戶

即世祖

西京在其治內太保

聰公劉秉忠也元史劉秉忠傳字仲晦初名侃因從釋氏

又名子聰拜官後始更今名隱武安山中天甯虛照禪師

遣使招致爲僧後游雲中留居南堂寺世祖在潛邸海雲

禪師被招過雲中邀與俱行旣入見應對稱旨中統元年

世祖卽位拜光祿大夫位太保故碑云太保聰公校秉忠

嘗居雲中寺故得傳世祖旨於圓公碑又云癸丑有獨謨

千翁主者太祖之女權傾朝野威震一方加師徽號按元

史公主表獨木干公主睿宗女非太祖女高唐王碑齊國

大公主祖宗征伐出嘗攝留務乃太祖女又云高唐忠武

王妃猶子鎮國子聶古解尙睿宗女獨木干公主子武毅

王尙齊國大長公主兩公主均降一族碑或以此而誤碑

云乙卯春慶壽虛席燕京府僚及海雲疏命師主之按乙卯憲宗五年碑又云今上皇帝及東宮太子屢於慶壽作大法會師厭於將迎退歸曲迴寺按元史世祖本紀至元三年四月庚午敕僧道祈福於中都寺觀以僧機居慶壽寺此作大法會之證碑又云小師沖公及西京官僚請移大華嚴寺以至元七年二月六日逝嗣法者七人首日照沖奉旨住大慶壽寺承海雲之道爲僧門總統次義辯次法鍾又碑有嗣法長老月公云云按月公見至元三年河解萬戶府河中府請月公住持普救寺疏碑碑末所題銜有功德主昭勇大將軍西京路總管府達魯花赤禿烈禿古思功德主昭勇大將軍西京路總管兼大同府尹守菩提心戒佛子蒙古功德主西京路前達魯花赤守菩提心

戒佛子帖本都忽思紺殿內莊嚴諸供養具雲中大檀越  
守菩提心戒佛子悟圓居士高至定本京大華嚴寺住持  
嗣法歸隱法鐘提點沙門至遷監寺沙門昭昶同立石宣  
授諸路釋教都總統頌海雲後事大都大慶壽寺住持嗣  
法筠菴昭冲立石枝禿烈禿古思等志均關載可据碑補  
高至定以莊嚴諸供養具悟圓居士結銜可爲攷晉故之  
助又按各寺觀碑例以功德主都功德主入銜而無守菩  
提心戒佛子字此碑並題亦異

### 王惲題解池詩

碑縱橫皆一尺九寸十三行行字不  
等行書後題四行正書今在解州

至元癸酉夏五月廿三日奉宣

明詔至於解梁得壁間王黃州所題解池詩序云監池之



大自唐已來凡臨蒞者無一詩以紀勝槩觀覽之際憤然  
成章或賦之者寔自予始僕切有所感焉因勉賦三詩以  
附驥尾之末庶幾因公而使天下知有惲云借來者府兵  
掾襄陵解楨子翁鴻侍行州判張居仁喜予此詩求刻于  
石於是乎書承直郎總判平陽路事汲郡王惲謹題

解梁城下解塩池萬寶騰光奪日輝我欲大觀窮化窟乳泉  
一賦了天機

日融池面爛生紅更有南山障碧空一夜高臺汗如洗州人  
說  
是廣南風

物之分留付後人暗將風雅欲誰親琨珠在側知形穢尚友  
何妨賦後塵

至元十年閏六月十三日立石

進義校尉解州判官張居仁

武略將軍解州知州張慶安

武略將軍解州達魯花赤玉節

蕪明摸刊

按碑言至元癸酉五月廿三日奉宣明詔至於解梁得壁  
間王黃州所題解池詩序按元史至元九年惲爲平陽路  
總管府判官又惲祭二賢祠記云至元九年惲自御史來  
官河東以是年十有一月案部至蒲明年五月復行縣次  
蒲癸酉至元十年永濟縣志載惲鶴雀樓記云蒲爲屬郡季得乘  
驛案劾元史地理志平陽路總管府領河中府解州此碑  
云癸酉五月者正惲出案部時與祭二賢祠記合王黃州  
題解池詩今碑存解署禹偁卒黃州惲舉所終官稱之解

州志載禹偁序並詩碑云偕來者府兵掾襄陵解楨子翁

孺侍行州判張居仁

州志誤作通判按元史百官志有州同知判官一員而無通判宜據碑正

之喜予此詩求刻於石於是乎書承直郎總判平陽路事

汲郡王惲題

惲衛惲人故題汲郡

校惲諸碑題銜皆曰承直郎平陽

路總管府判官此獨曰總判平陽路事蓋與今府州縣官

不題本官而曰知府州縣事同元史惲傳大德五年授其

子公孺爲衛州推官此碑作翁孺卽其人碑末題銜有進

義校尉解州判官張居仁武略將軍解州知州張慶安武

略將軍解州達魯花赤王節並見州志三人皆武階以武

班進身者也

### 太平縣文廟賢廊碑

碑連額高三尺七寸廣二尺一寸二十行行三十字正書  
額題絳州太平縣重建文廟賢廊碑十二字篆書今在太

平縣

絳州太平縣重建文廟賢廊碑

前翰林修撰監察御史陞充承直郎平陽路總管府判官  
王惲撰并書

從仕郎平陽路總管府經歷田伯英篆額

二帝三王之道遠

孔子而後明然師受私淑傳之後世俾彝倫攸叙而不斁者  
七十子有力焉是則配侍於聖人也宜矣太平晉國故封  
今為絳之劇邑襟山帶河衝會南北故其俗率勤儉剛義憂  
深思遠有陶唐之遺風焉為縣者必欲明倫復古吾夫子之  
教其可後乎縣有廟學舊矣

國朝以來具法宮而虛兩序春秋奠獻自侯以降位設牖下

其於典憲是殆闕然迨至元八年夏進義副尉平遙任興嗣  
來主縣簿覩其如是愾焉興感迺祇會教官張鑄孫天鐸賈  
彥良洎邑之士人相與庀材僦工經營以方不期月而告成  
厥功凡為室東西各五楹翬飛翼棘矣焉維新遂圖七十子  
肖像於壁元哲當座素臣儼如載尊載儀咸列斯宮吁其偉  
哉以至元癸酉秋八月釋菜之禮用安神棲邦人嚮化士興  
於學若任君者於承宣之職可謂知所先務爰作詩以歌之  
其辭曰

元聖垂教 先天後終 用廣發越 群賢之功 於赫  
魯語 如日在空 建極明治 萬古攸同 宜其報禮  
極熾而隆 奕奕兩序 厥功固微 小善罔棄 大  
焉可希 刻詩廟門 來者庶幾

大元國至元十年歲次癸酉秋八月朔日前平陽路提學  
張鑄立石

李仲誠刊

按太平縣志文廟在縣治西北德化坊建自唐時元至元  
八年主簿任興嗣修總管府判官王惲有記卽此碑又按

碑云國朝以來具法宮而虛兩序自侯以降位設牖下聖廟究屬新郭四公至元八年任興嗣來主縣簿會教官

外兩廡自費侯始張鑄孫天鐸賈彥良庀材僦工不期月而成遂圖七十子

於壁元哲當座指費侯素臣儼如詳繹碑文興嗣所修者

東西廡與碑題重建賢廊合殿固未修縣志不別白言之

嫌未核縣志有元主簿任興嗣平遙人教官張鑄以碑考

之實元前平陽路提學孫天鐸賈彥良志皆列之訓導非

元官名碑文王惲撰元史有傳惲中統二年轉翰林修撰至元二年首拜監察御史九年授承直郎平陽路總管府判官皆與碑合按元始不重儒教中統二年始置諸路學校至元以後乃詔天下立學一時文藝之士憫聖道之久鬱幸儒術之克昌於是作爲文記勒之貞珉以彰復古之盛元文類所載修文廟諸碑可證也惲善屬文亦見本傳篆額之田伯英卽汾東王記篆額之人前銜爲宣差五路萬戶府參議此碑銜曰從仕郎平陽路總管府經歷仍幕職也元百官志從仕郎正八品總管府經歷從七品

聞喜重修廟學碑

碑高四尺三寸五分廣二尺二寸二寸  
五行行四十八字正書今在聞喜縣

解州聞喜縣重修廟學碑銘

承直郎平陽路總管府判官前監察御史汲郡王惲撰并書

資中鄧壽篆額

堯舜用道以治天下孔子任道以垂萬世其所以明倫建極論政造士邇說遠懷者不外夫術有序國有學而已後之君人者思欲化隆唐虞坐收牖易之道舍

夫子之教將安瀛歟我

國家尊師重道明德新民風動海寓爰自京師達於郡國鄉遂率建教官勉士以德趨民於學其比隆致治之意固云極矣而承宣奉行寔守令之職是則道生之本教始之基其可後而聞喜在秦曰左邑桐鄉逮漢元鼎間始易今名其為縣浸董澤奠鳴條雄盤遠帶風土夷沃通晉走蒲古為咽會名



卿碩德代不乏人顧山川之氣鍾靈萃秀必自人文德化薰陶浸漬輔相裁成者耳縣廟學舊矣枕城之艮隅地勢穹隆如神龜負圖背露淵水蒼官蒼鬱環列庭庀秋煙古色望之儼然皆數百年物也按廟碑由宋汧金宰是邑者增崇非一故制度宏麗甲於諸縣遷革已來神棲碑屋幸脫煨燼然歲年綿邈人跡罕至浸淫于壤藪草棘而宅狐狸蓋有年于茲至元己巳從仕郎張君來尹是縣首以營治為任迺謀於同僚曰是役之興雖仰體教條當以身帥先贊襄者緊公等是賴於是監縣事脫台簿司天祿佐史劉瑞爭出廩料資所須而濟厥熾爰及吏民感其誠敬聿來趨事如棲棟桷榱之傾腐者瓴甌陞階之缺裂者舉易而新之復起講肄之堂齋廡之位泊夫神門庖庫畦圃游息之所莫不畢備用至元十年

春二月釋菜禮告成厥功百年儒觀頌還於舊粵明年春佐  
史劉瑞介汾西前尹王延季持溫國文正公學記踵門而請  
曰不腆敝邑猥致力於鄉校功甫僉而尹適去於可俾上官  
之善藐焉無聞於後以職以分瑞也寔任其責擬揭諸麗石  
以告來哲不肖素陋於文以懇禱堅切辭不獲已敢勉為書  
之又竊喜幸得列名於司馬公之下風固所願也尹晉之臨  
汾人諱仲祥資明良果於從政故其為善卓卓有成也如是  
較夫從事於簿書期會之末者不曰有志於本知教之所興  
欬新令尹蕭君復繼而克行以增益其未至者異時化成俗  
美不權輿於諸君者耶誠可歌也已其辭曰

維漢聞喜古桐鄉東浸董澤南條崗千年高木秋煙蒼廟宮  
盤盤枕艮方平時絃誦溢兩庠代不乏賢古明良如儉顯魏

山石不秀異卷之二  
度相唐風雲感會龍虎驤至今德業何昭彰神居雖存圯且  
荒蒿萊没人狐兔蔽風雨穿漏摧棟樑張君下車心慨傷首  
以營治如弗遑同僚見義為贊襄咨嗟吾道百孔瘡頃還舊  
觀蔚有光齋廬有室講有堂我南走蒲過此邦親覩盛事思  
彷徨吾儒有例善則揚作詩豈惟示不忘士民嚮化此本張  
嗚呼廟碑古甘棠

敦武校尉達魯花赤脫台

從仕郎前縣尹張仲祥

敦武校尉口尹石抹忙古女

主簿兼尉司天祿

大元國至元十一年歲次甲戌秋七月既望平陽路解州  
聞喜縣典史前河中府提領案牘官劉立石

蘇明刊張珌刊

按碑題承直郎平陽路總管府判官前監察御史汲郡王  
惲撰并書資中鄧壽篆額按元史王惲傳惲以至元五年  
爲監察御史九年授承直郎平陽路判官十四年除翰林  
待制至元十一年惲祭二賢祠碑亦題承直郎平陽路總  
管府判官汲郡王惲撰與此碑結銜同按元平陽路得今  
河東一道及潞澤遼沁地惲時爲判官故今晉南郡邑多  
有惲詩文碑碣其見今碑本及方志者如永濟栖巖寺碑  
鸛雀樓記祭二賢祠碑太平文廟賢廊碑及此碑皆是此  
外尚移春明夢餘錄天慶寺碑至元九年王惲撰并書然則惲  
不止工文又兼能書也碑言聞喜廟學碑由宋汧金宰提  
邑者增崇非一制度宏麗甲於諸縣按宋咸平四年知聞

喜縣慈卿重修文廟縣尉李垂撰記至和二年知縣事馬中庸重修司馬溫公撰記金大定二年權縣令王宗儒重修自撰記並有碑此謂由宋迄金增崇非一也碑云至元己巳從仕郎張君來尹是邑首以營治爲任監縣事脫台簿司天祿佐史劉瑞爭出廩料至元七年春二月釋菜禮告成厥功粵明年佐史劉瑞介汾西前尹王延年持溫國文正公學記而請曰敝邑致力鄉校功甫僣而尹適去云云按己巳至元六年此張仲祥以至元六年尹聞喜十年去之證碑末題銜有敦武校尉達魯花赤脫台從仕郎前縣尹張仲祥敦武校尉關尹石抹忙古女主簿兼尉司天祿按脫台仲祥天祿皆見縣志石抹忙古女石抹欽定國語解作舒穆以至元十一年任可補志闕又碑後書至元十一年七

月既望聞喜縣典史前河中府提領案牘官劉瑞立石碑

有云尹晉之臨汾人

諱仲祥

賁明良果於從政新令尹蕭君

復繼而克行以增益其未至者按石抹卽蕭氏元史石抹也先傳其先嘗從蕭后入突厥及后還而族留至遼爲述律氏遼亡改石抹氏故遼述律諸后皆稱蕭后此碑題銜書石抹者舉其官氏紀稱蕭者推其本氏其實一也輟耕錄石抹漢姓曰蕭可證碑見通志金石記

## 二賢祠碑

碑高三尺八寸廣二尺十八行  
行四十二字分書今在永濟縣

首陽山孤竹貳賢祠肇見於杼唐增脩於前宋金貞祐末爲戍兵撤而燬之

國初郡人徐帥因廢基而屋焉後四十載當至元九年公默

歲憚自御史來官河東以是年冬十有一月察部至蒲適致祭  
令丁遂齋沐捧祝祇歿墟墓庭序鼓翳路寤傾圮  
遺像默昧侈剝就滅烏乎前政之不舉至于斯耶非惟不稱

明詔尊顯風烈之義而大懼不職下殞 教

條吏嚚不恭惡可徇狃於是會誌屬吏作新是圖資聚既盈  
衆工趨事仍命府掾長吳舉董治厥役改新肖像以儆神儀  
逮明年夏五月復行縣次蒲吏告訖功用六月丁亥躬率僚  
屬以少牢之奠揭虔妥靈帶河表華新宮翼然山煙庭木奕  
奕動色守吏不任之責庶乎其少塞矣知府楊居寬請書其  
事于石以詔來者噫 二賢聖之清者也其出處大節

求仁本心興懦厲貪之操息邪懼亂之功孔孟稱之詳矣揭  
若日月亘終古而不熄小子其敢擬諸然讀羹太史廟碑所

述去國諫伐蓋宋國有不說好事者為之說耳竊有所疑焉  
若曰非讓而逃國人惡而逐之惡全其編賢也且以辟紂不  
有其位子貢何以審夫子不為衛商乎至於義抗白旄耻食  
周粟亦謂事不經見臧哀伯何獨稱武王克商義士猶或非  
之不然二賢口北自海顓臾善養來歸當周命惟新明義崇  
德之世不知俯仰何所愧怍偃蹇於茲山之下乎故特表而  
出之必有能辨之者仍為蒲人作迎享神辭俾歲時謠以祀  
焉其辭曰

瓊靡潔兮蘭馨錯口疏兮慶神庭條之山兮河之水回風蕭  
二兮波瀾二神之遠流兮邇曷歸南叫虞舜兮帝禹興追以  
暴易暴兮知其非 國極所欽兮祀典載熙繁非周粒  
兮桂酒芬菲民之戴神兮清風庶幾偃回旆兮入室陳鐘鼓



今載考載擊千秋兮萬歲於焉兮永息

承直郎平陽路總管府判官汲郡王惲撰

嘉議大夫河東山西道提刑按察使東魯王博文書并額  
大元國至元十一年歲次甲戌秋九月二十日中順大夫  
河中知府楊居寬立石

監修府掾秦容

古桐蘇明刊

按碑見永濟縣志碑末題承直郎平陽路總管府判官汲  
郡王惲撰河東山西道提刑按察使王博文書并額至元  
十一年九月二十日河中知府楊居寬立石按元史王惲  
傳字仲謀衛州汲縣人故碑題汲郡傳又云好學善屬文  
中統元年姚樞宣撫東平辟爲詳議官擢爲中書省詳定

官二年春轉翰林修撰同知制誥兼國史院編修官尋兼中書左右司都事治錢穀擢材能議典禮攷制度咸究所長同僚服之至元五年建御史臺首拜監察御史諭事凡百五十章秩滿陳天祐雷膺交薦於朝九年授承直郎平陽路總管府判官十三年奉命試儒人於河南十四年除翰林待制

官至翰林學士階至資善大夫大德八年六月卒諡文定

永濟縣志憚登鶴

雀樓記至元壬申三月來官晉府因喜曰蒲爲屬郡季得乘驛檢劾十月戊寅奉堂移按事此州卽此碑所云以是年冬十有一月按部至蒲之事王博文見元史王憚傳與東魯王博文渤海王旭齊名是博文亦元初文士碑題里貫與元史合又元提舉常平徐君墓碣題河東提刑按察使王博文撰云至元甲戌子官太原甲戌至元十一年然則

博文於至元十年前已爲河東山西按察博文又見徐文毅嫺皇廟碑

元史至元十三年二月戊申立浙東西宣慰司吏部侍郎

楊居寬同知宣慰司事元史世祖紀至元二十三年三月

乙亥楊居寬典銓選二十四年十月丙子誅楊居寬續資治通鑑

鑑至元二十四年十月丙子僧格奏參知政事郭佑楊居寬坐虧負中書錢穀並棄市人皆冤之僧格之誣殺佑與

居寬也刑部尚書博果密以此碑證之則居寬以至元十

爭之不得僧格深忌之一年嘗知河中可補史闕碑多奇字如李作杵玄作舍之

類殊不可爲訓

重建棲巖寺碑

碑高四尺五寸六分廣一尺九寸二

重建十方棲巖禪寺之碑

十四行行六十字正書今在永濟縣  
宣授河東南北路宣撫司叅議攝行司事陳廣撰

承直郎平陽路總管府判官前監察御史王惲書

忠顯校尉同知絳州事攸中孚篆額

夫釋氏之興肇自竺乾祇陋精舍廼給孤獨賈地布金之所請佛居之於是大覺領衆闡法隨機逗教導物拯迷受

其利而證果者不為不多矣暫被權機未傳真實其風既著然後拈花示衆謂之密傳妙心甘露一傾洽流東土騰蘭涉漢抵於洛京方傳譯利生帝遵民服遂乃創修十寺俾

二衆有安棲之處樂然行道以報國恩此震旦伽藍之

始也教雖布化禪猶未興繼後梁魏主分天下菩提達磨祖師航海而來游梁涉魏壁觀於少林直接上根口器已而續艷聯芳咸傳江表至於百丈方豎叢林目之曰禪刹俾覩聚寰海衲子遞扇宗風建立既多名號亦異有以山川形勝名

之者龜山鶴林之類是也以國家季號名之者開元景德之類是也又以崑名之者天下有三焉濟南之靈崑上黨之紫崑河中之棲崑以前二而較之莫若於棲崑也究其初實隋之曇延菩薩輶光之地寺之形勢虎踞龍蟠冠中條之秀絕東觀蒲坂西矚秦川南接首陽北窺晉救去舜城不滿一舍之地城之官廡詣寺祈福以至登亭眺望有不忍回之者其故何哉以寺宇宏麗山景清幽而致然也偶罹兵革悉遭焚毀變為荆榛瓦礫之場殆數十年孰能再復壬辰癸巳之後河朔甫定有贊公戒師心欲重構力所弗克同府署官等僉議曰此之金地乃自來十方禪刹非具大福德宗師未易興之時懶牧楫公大禪師主仁壽法席學徒雲萃名譽日新乃具疏敦請既至路僻林荒人虎交錯師訢然欲興復之不二

載聞師忽歸逝今後中書大丞相與府牧竭誠勸請嗣法瑞峰欽公禪師繼之公就命戮力不倦採豫樟之材植化信士之金珠衆皆勸作經之營之僅廿餘稔方鳩僦功法堂

佛殿廚庫僧堂望川亭絕境軒乃至丈室通過滿目一新仍於山下廣置產業以贍清衆公雖日行修造而傳道接納未嘗少間繼續心燈者分燭照映諸方感踞道場光明不絕於至元辛未冬

朝廷頒旨選天下道德兼備者禪教師德就燕都設會令二宗論議公預其數至於宸闕親面

龍顏上錫法衣淨賄既佩恩而歸仍行舊令再為林泉主人公將近縱心之年其利物之念愈隆真本色住山人也公一日遣人賁舊記謁予求文將礪貞石以昭後世俾晚進者知

前人之用心激勵其志令坐進斯道不亦善乎予曰吾儒士也豈委釋門廣大之事哉況公住寺已來誠言實行皆在遠近之耳目矣奚假文為曰願贈一言用光梵宇子搆讓不已然之以為銘辭銘曰

佛日初昇 竺乾道弘 教流東漢 梵剎方興 鼻祖

傳芳 風行草偃 百丈標宗 始開禪苑 法既攸同

寺何有窮 隨人建立 各振玄風 蒲之棲崑 河

東冠絕 兵火一焚 變狐狸穴 緇素慘悽 邀懶牧

師 惠然而應 創業開基 師偶緣終 瑞峯相繼

內外雍容 若合符契 寺宇番新 傳持得人 核生

茂葉 思濟斯民 承旨赴都 愈增道價 主持錫衣

光明遠射 鐵石肝腸 嘯馳八方 祖庭日月 苦

海舟航 琬琰磨礱 敷言紀述 後進英賢 當宜知

悉

外護都功德主 宣差平陽路征行兵馬都元帥同知

府事兼河中府達魯花赤南北路舡橋都總管謝堅

大元國至元十一年歲直甲戌冬十二月八日監寺僧至  
和立石

古桐蘇明刊

按碑始述寺得名之由及其形勝後以兵革遭燬懶牧楫  
禪師欲興復不果而卒瑞峰欽禪師集衆貲修建二十餘  
年乃成以永濟縣志暨史考之棲巖爲河中諸寺勝賞之  
最唐時名士多游於此吟詠尤衆與碑所云寺之形勢虎  
踞龍蟠冠中條之秀絕東觀蒲坂西矚秦川南接首陽北



窺普救城之官庶詣寺祈福登亭眺望有不忍回者相合

首陽山在永濟縣南三十里普救寺在縣東六里

普救唐西永清

院後漢郭威平李守貞更名

碑云兵革遭焚者謂金末蒙古之亂其曰

壬辰癸巳之後河朔甫定者按壬辰金哀宗天興元年蒙古圍汴癸巳天興二年汴降蒙古次年則元太宗六年宋端平元年蒙古滅金此河朔甫定之證後二十餘年則元定宗世至元辛未系至元八年碑云有以山川形勝名之者龜山鶴林之類是也以國家年號名之者開元景德之類是也又以巖名之者天下有三焉濟南之靈巖上黨之紫巖河中之棲巖以前二較之莫若於棲巖也按一統志龜山寺有上下在盱眙縣宋天禧中建鶴林寺在丹徒縣晉太興中建開元寺在永濟縣唐開元時建景德寺在長

治縣宋景德時建此類甚多略舉一二靈巖寺在長清縣  
魏正光中建紫巖寺在壺關縣皆名勝碑文爲陳賡撰王  
憚書賡見河汾諸老詩金三白渠規措使仲謙子山西通  
志累官河東山西道行中書參議有才名與弟庾俱從元  
好問游憚已累見按元史本紀至元中屢設資戒大會可  
與碑燕都設會者相參刊石之蘇明天眞觀記題解池詩  
聞喜重修廟學碑二賢祠記皆其所刊當是名手古桐卽  
聞喜也

棲巖寺佛殿佛像記

碑分二截高四尺五寸五分廣一尺八寸上截十八  
行行二十四字正書下截刻僧衆人名今在永濟縣  
重修佛殿并塑畫佛像記

嗣祖沙門祖乘撰

時有遷改物有廢興能改舊為新廓小為大者必奇人也瑞  
峰老人懷古標致傳道之暇建立之念尤勦勦然斯棲巖梵  
宇廢于兵火之中師既住持重新修葺中豎紺殿愈越舊有  
材鳩杞杆匠選高名經之營之突然聳出觀之者僉為嘆服  
自非大力量人何能成茲勝事殿工稍就師曰有殿無像孰  
生敬焉由是於內塑粧弥陀三大士一堂俾衆瞻仰復於東  
左綵繪藥師如來并藥叉衆西右綵繪熾威口如來口九曜  
衆後之兩壁畫文殊維摩對談像後正壁畫大悲菩薩師之  
用意非偶然之作藥師者與衆除患令其獲安熾威光者為  
衆消灾俾其得樂維摩寂默祖意頓彰文殊讚言法門不二  
大悲者拯危濟溺拔苦導迷弥陀示唯心淨土勢至勸攝念  
歸真更有觀音當陽漏逗鶯啼燕語說破家風鼓響鍾鳴闢

開戶牖略提梗槩庶得紀綱殷有所示像有所表即意若斯  
官豪為之贊助或施工力或捐經金有始有終盡善盡美  
祖乘 忝續其孤嗣在法孫述此鄙辭聊讚威德之万一云  
爾

海眾等 至偉 至壽 道謙 懷濟 至德 普祥

至興 至政 至寬 至信 至敬 廣玉 從顯 德  
昭 至遠 至憐 至英 至辯 符遇

侍者 拈香至全 請客廣才 湯茶至秀 衣□至明  
眾知事

化主僧子忠 外庫主至諒 僚主僧至真 殿主僧至

安 林□□至□ 浴主僧守慶 磨主僧至理 庄主

僧至進 園頭僧至勸 修造僧□□ 首座僧印銳

書記僧本淨 知藏僧至謹 知客僧至仁 庫頭僧善  
淺 監寺僧至和 副寺僧至元 維那僧洪浩 典座  
僧至堅 直歲僧法雪

皆大元國至元十一年十二月十五日十方棲巖禪寺住  
持傳法嗣祖沙門法欽建

按碑題嗣祖沙門祖乘撰碑言瑞峰老人以傳道之暇葺  
棲巖梵宇其所修殿視舊有而逾之又因殿工既就無像  
迺粧塑彌陀大士諸像以爲表示碑云瑞峰老人卽陳賡  
碑所稱瑞峰欽公大禪師者又卽疏請內之欽公  
大禪師均見前碑按棲巖  
寺重建於至元十一年有前碑  
可證此爲重修佛殿內繪塑像

而作與前碑同一年碑題祖乘諸人應皆爲老人傳道所  
授者

陳規墓表

碑高三尺二寸廣一尺八寸二十九  
行行五十一字正書今在稷山縣

故中議大夫中京副留守陳公墓表

右司諫穎川陳公以直道不容於時由諫垣出為中京副留守兼倅河南府事未到官以疾卒於開封杞縣圍城鎮之寓舍春秋五十有九歲己丑五月初三日也權厝於園城之浮屠寺間至京師賢士大夫哭泣相弔於朝曰哲人亡矣公卒之五年河南平又二十有二年孤女志寧間闕千里躬負遺櫬始歸葬於稷山之陰琬康鄉小甯村先塋之次又二年公之邑人段成已掇公之族出文行歷官壽年以揭於墓成已亦陳氏壻也且辱公知為厚不腆之文有不得辭焉公諱規字正叔漢太長寔之後傳世悠遠譜系不明迨公之五世

祖由太平避亂稷山遂為絳州稷山人鄉間指為德門曾大父某大父某父密皆畜德不耀晦跡農畝公貴贈大父某官父中議大夫中議公娶梁氏□生三子長曰靖其季即公也幼童遲不與餘兒群始知讀書月開日益不煩戒飭鄉先生崔邦憲教以課試法無幾何時進業出諸生右始任戴冠補州學生提舉學校田彥實以藝學聞天下識公為遠器徵登于門俾誨其子年廿有四擢明昌五年進士第歷華州下邽平陽臨汾二縣簿皆有治績試書判入等知臨洮渭源保渭源地邇羌戎俗頑獷難治公簡其政令使信而易從人便安之為勑孔子廟制禮器春秋率寮屬釋奠民吏觀歎甫歲王化朝求直言公以十四事指撻時病幾數千言書上不報改潞州觀察判官遷和川令丁母潁州郡太君喪前在潞日母

夫人病革百藥不治夜中穆禱曰母有過許自新願以一紀之祿易數年之命天地鬼神實聞此言于今蓋三年矣卒喪知恩州厯亭縣縣餘四萬戶方時多故荐饑之民勞弊於徵發公下車剗削荒蕪卵翼鼓哺而民力以蘇事亦辦治以材轉京兆府路察察從事使李炳挾材不禮其屬下承望奔走抑首無與為抗公獨屢爭以事不屈退食以七十題命公詰旦袖詩以進炳讀未終卷回頭發赤易矜為媿以父憂去職三年召入為開封府判官拜監察御史舉劾無所避出同知壽泗二州實經厯徐州行院移授宿州節度副使經厯元帥府事入知登聞鼓院公謂鼓以申冤抑局戶鎖院非法意乃榜條畫於門置鼓通衢下情以通改刑部郎中守法不阿拜右補闕升右司諫自居諫職以靜引為已任天下事有可言



勇不為身計排斥權倖章奏無虛日雖得君如高咏相某侏  
平章某師右丞某事不厭衆望皆極言其失事雖不行而怨  
疾亦多矣近侍二張一李皆以倖進撓亂朝綱人莫敢指撻  
公疏其姦狀以聞既而皆降外除未幾命復其位公力言於  
朝曰國勢如此而姦人猶在君側奈社稷何聞者為縮頸三  
人者卒不用公之力也而公亦由此而出禮部閑閑趙公嘗  
謂人曰正叔與人語恂恂如不能出諸口乃論事人主前辨  
別條理纖悉無不盡可謂仁者之勇君子之剛南渡後儒風  
日入頽靡狂生恠士競以口舌取重一時以閑閑公之宿德  
猶被侵侮至言及公不敢有異議而以鉅人魁士目之凡再  
典貢舉其得人居多自始學至疾病書未嘗一日去手有律  
身日錄雖筐篋細碎必謹記無遺漏則公之自修可知已平

昔著述諫藁亂後所存無幾獨其始終大節表表在人耳目者如此配潁川郡君蘇氏先公卒趙氏沒於亂蘇氏三子男一人汴至燕而亡女二人長嫁甯氏子南容次嫁燕人趙遵周遵周卒為女冠師今葬公者是也二姪知柔知剛早以公廢仕相次以沒公官于朝内外三十有五年歷十六官階累至中議大夫勳上輕車都尉爵潁川郡開國伯邑食七百戶死之日廩無見糧褚無長物無田以為歸無宅以為居吾聞位不稱德者必有後公之子不幸短命而死而燕之二孫元允皆卓卓有文名我公其終有後乎歲戊午中秋前二日段成已述

前解塩司判官杜灝篆額

張德信書丹

山右名賢集卷二十一  
至元十一年歲次甲戌 月 日孤女志寧立石

任信刊

按碑言公由諫垣出爲中京副留守未到官卒於開封杞縣寓舍歲己丑五月初三後五年河南平又後二十二年孤女負櫬歸葬又後二年段成己乃爲墓文按金史陳規傳出爲中京副留守不著年月以碑未到官文審之知爲己丑年證諸年表實金哀宗正大六年又五年天興三年金亡卽碑所謂河南平是又二十二年元憲宗六年丙辰又二年戊午台前記之得三十年是自卒至表墓已積有歲時也碑又言公諱規字正叔漢太邱長後父密以上皆不仕以公貴贈官公以明昌五年擢進士歷下邳臨汾二縣簿知臨洮渭源以十四事指撻時病改潞州觀察判官

遷和川令知恩州歷亭縣轉京兆府路案察從事召爲開

封判官拜監察御史出同知壽泗二州經歷徐州行院移

宿州節度副使經歷元帥府事入知登聞院改刑部郎中

拜右補闕升右司諫排斥權倖章奏無虛日雖至高丞相

侯平章師右丞亦皆極言其失近侍二張一李人莫敢指

撻公獨疏姦狀以聞其始終大節表表在人耳目如此按

碑諸言證之本傳均無不合所異者史自監察御史叙入

傳其先諸事概從刪削而中州集又不甚詳可據此碑補

然其大略有可質者高丞相卽高汝礪是見續通鑑興定四年三月爲尙

書右侯平章卽侯摯是見本傳天興元年八月爲平章政

丞相言參政侯事今規傳貞祐三年十一月上章師右丞卽師安石是見本傳正大四

摯不報一李則張文壽張仁壽李麟之是師安石傳正大五年臺

壽李麟之安石亦論列不已上怒甚所謂臺諫者規此時正在補闕也規本傳有條陳八事

上覽書不悅詔付尙書省詰之宰執惡其紛更諸事謂所言多不當於是規惶懼待罪又正大中上召羣臣諭以陝西事規獨進曰兵難遽度百聞不如一見臣嘗任陝西官近又屢到陝西兵將冗懦恐不可用言未終烏庫哩四和曰陳規之言非是臣近至陝西軍士勇銳皆思一戰完顏錫鞬從而和之上首肯据此碑則規任下邳臨洮渭源皆在陝西故規云任陝西官碑云男一人汴至燕而亡女二人長嫁甯氏子南容次嫁趙遵周遵周卒爲女冠今葬公者是也按中州集子良臣在燕中則今碑所闕者當爲燕中然謂早亡二孫元允皆有文名則又中州集與傳所無者据碑可補又本傳死之日家無一金知友爲葬之是據

傳所言葬公者知友非公女也然當時事實自應以碑爲斷傳則本其後之所聞恐未徵信耳亦可見公之清儉勤正有非他人所及矣傳尚有規言事不假借朝望甚重凡宮中舉事上必曰恐陳規有言一時近臣竊議惟畏陳正叔耳挺然一時直士也是碑所謂至言及公不敢有異議者如是碑後題歲戊午

卽元憲宗八年

中秋前二日段成己述前

解州鹽司判官杜灝篆額張德信書丹至元十一年歲次甲戌孤女志甯立石成己與公同爲稷山人故爲製文

霍邑縣杜莊碑

碑分二截高三尺廣一尺九寸上截十八行行三十九字至四十字不等下截刻本村人戶計兩列二十行均行書今在霍州

霍邑縣 給

據杜莊村馬口高移成貴惠吉祥連名狀告伏為東城村東有淋浸水泉九十六眼次下合流一處其水自來止是本村食用其余村庄人戶並不得洗衣裳淘菜飲牛穢污等事却為泉水微小及渠道上下遠寫水流不到以上本村衆人戶將宋壁村澗北古舊泊池一個淘開足水逐旋放流本村食用至至元十年四月十八日有宋聖村任二妻趙三妻圪訖上頂泊池根底石堦又被宋聖村趙一趕牛五隻趙大趕牛一隻相水渠內飲牛攪糞穢污以此情等具狀經詣霍邑縣衙陳告蒙受理施行間有宋聖村趙一趙大任三王林賈珍趙三托令東城村靳榮北杜壁村王玉等社長石鼻村梁社長共舉靳聖村蘇鄉老勸和寫立私約該今後除宋壁村人戶食用外口不敢相杜莊村古舊有倒食用水內及足水泊

池并上下渠內飲葦畜口疋淘菜洗衣裳穢污等事及任二  
妻趙三妻將元圻訖泊池根底石坎依舊修壘了當如今後  
但有違犯之人情願准罰白米叁拾石充本村祇應用度及  
有依時耕種過往牛畜及上秋後撒放大倒口口至在科罰  
之限立訖如此私約合同收執及具一同攔狀抄連私約赴  
官告攔了當今事情等付得在手口無係官堪信憑據切恐  
已久口致昏昧據此合行陳告伏乞霍邑縣詳酌給據各行  
事縣衙為此照勘得此宗元行文案并取資的本私約並與  
所告相同取據公憑合行出給者

右給付杜莊村馬清等收執照用准此

至元十二年三月初七日給司吏馬澤民劉鐸行

主簿兼尉李



將仕郎霍邑縣尹高

押

達魯花赤幹兀魯阿思蘭

押

本村人戶 金田院

蘭懷璧 李思恭 劉百戶 馬祐 馬琳 馬驥 妙

峯院 成寬 趙秀 李三 馬定 馬潤 楊和 高

恩 張泰 苗榮 任四 楊三 溫海

以上上列

馮德 高瑞 馬順 遇聖院 馬信 成進 楊二

趙玉 白寶 賀二 賀福 馬進 辛榮 趙福 張

祐 喬德 小劉 劉善

以上下列

按此碑即高鴻神泉記所言之杜莊編民訴有違水例者

狀文質俚不足錄所言村落名如宋壁杜壁

二村在今霍州東北白四

里

亦在白四里見州志

宋聖等名皆可為考元時霍州地者之

助碑末題至元十二年三月初七日所列諸銜有主簿兼尉李將仕郎霍邑縣尹高達魯花赤幹兀魯阿思蘭高郎高鴻見州志元史地理志霍州霍邑下倚郭明始併入州故元得有縣尹又百官志上縣從六品達魯花齊即達魯花赤一員尹丞簿尉一員中縣秩正七品不置丞下縣秩從七品置官如中縣民少事簡之地則以簿兼尉此碑主簿兼尉李卽其證

神泉記

碑連額高三尺廣二尺十九行行三十二字正書額題三字分書今在霍州

唐太宗御賜杜將軍神泉記

并尚書省掾將仕郎霍邑縣尹高鴻信卿撰

希玄明義葆光大師平陽路都道判周復齋伯達書

隋末天下大亂太宗起義兵於太原過介休為呂州

貞祐二年改為

霍州宋老生據其隘而不能前時有一白髮老翁

乃霍山神也張天覺詩云

丹書七智伯白髮詣秦王

告之呂鹽商古道

今千里遙是也

太宗棄輜重

潛師宵進巡霍山而南次于東城是日軍中闕食原谷無水  
太宗患之仰天祝曰煬皇不道萬民愁怨天實肆于克除暴  
亂何困我如此 會杜莊大族杜十王者獻糧數千斛或又  
報主之乘馬跑地而嗅顧人長鳴侶有所告太宗視之解其  
意親呂劔擽地泉水涌出將士驚異而賀曰天贊我也号馬  
跑神泉明日与老生戰于彘澗之北隋師敗績老生死之於  
是唐兵大振長驅入京師如蹈無人之境及隋滅而太宗即  
位封

霍嶽中鎮為應靈王建祠于山中令歲時致祭拜杜十萬為

大將軍且多賜金帛杜公舜曰臣世本農家以父祖之靈衣食稍備但所居之地不可鑿井艱得之貨唯水而已富與貴非臣之所欲也帝遂畧馬跑神泉賜之勅有司禁隣近之民無使侵用穢汚犯者有罪後人相因世為水例舊有碑記干戈焚蕩畧來不知所在至

大元至元九年予畧省掾除本縣尹久之杜莊編民訴有違前水例者乞懲戒命吏治其事被告之徒懼罪立約告咏准詞後復給公據于官仍求文于子請刻諸石永為照用就採耆老之言乃為之記

大元至元十二年歲在旃蒙大淵獻秋七月望日立石

石匠里人馬淵男馬智刊

按碑題前尚書省掾將仕郎霍邑縣尹高鴻信卿撰平陽

路都道判周復齋伯達書霍州志藝文元神泉記至元十

二年高鴻撰卽此碑碑云唐太宗起義兵於太原過介休

爲呂州

原注貞祐二年改霍州

宋老生據其隘按太平寰宇記晉州

霍邑縣唐高祖平霍邑置霍山郡武德元年廢郡復置呂

州因呂鄉爲名

隋開皇置呂州大業廢

貞觀十七年州廢金史地理

志晉州霍邑貞祐三年七月升霍州是霍邑自唐貞觀廢

呂州後至金貞祐始復爲州原注未析不可不辨碑言白

髮老翁云云與舊書本紀太平寰宇記略同至所云告之

以鹽商古道則較諸史爲詳碑注千里徑見周書陳王純

傳建德五年大軍復東討詔純爲前一軍守千里徑是也

其云軍中闕食證之舊唐書高祖太宗紀有餽運不給義

師糧盡文諸史無民杜姓獻糧事得此可補其闕唐會要

天寶十載正月封霍山爲應聖公此碑言太宗封應靈  
與會要異又霍州志馬跑泉在州東北杜莊村唐太宗馬  
蹄跑得泉時杜十萬以餉師功賜此泉卽據此碑爲之碑  
末題大元至元十二年七月望日立石與州志至元十二  
年合

解州廳壁記

碑高一尺六寸廣二尺三寸三  
十行行二十字正書今在解州

解州知州州判廳壁記

至元十一年歲在甲戌春奉訓大夫前

尚書省宣使鄭公奉

朝命來守是郡自下車之後整肅公庭移易風俗勸農興學  
便利百姓政以清白無秋毫之所犯由是斯民從化如風之

偃草也次年夏六月大旱禾苗將槁公為已憂詣 名祠躬  
取聖水露首於赤日之下跣足於沙石之中往復十有餘里  
不憚其勞至誠祈禱感通于

天三日雨大霑足僚吏伸賀於庭農民歡騰於野變憂為樂  
若疾而起非公之□□古尔邪□而見城市瀟條民闕生理  
無以致人口□□盛公退之餘因動其心顧謂 州判石公  
言曰解之為郡昔恃鹽池之利百商往來民得以樂其生郡  
得以增其感爰自

我朝統一之後西場弗置塩在□村支發久其年矣古人有  
言曰廢而復之為是習而循之為非吾將謀復西場之舊制  
以利州人庶今之守是郡得免夫循昔之慊耳此意一舉詢  
謀僉同於是聞諸

上司上司以俞不暮月之間敖房廨宇炳然一新商旅得以  
享懋遷之利居民得以遂治生之情城市得以壯規模之威  
事既克成閭閻父老填溢公門為歌而賀之曰賢哉使君  
之用心也舉廢能興遇旱得雨政治民心歡欣鼓舞以此觀  
之非公之正心誠意安能得民之如是乎雖張湛之兩歧廉  
範之五袴時為□□公今之政又宜過之慕□□□巨川泊  
掾吏諸公訪予具道其始末丐以為文擬刻于石為靜安堂  
之壁記庶公之美名傳之不朽也倅不得已於是乎書謹記  
至元十三年歲在丙子十月 日立石

石匠李義信刊

校碑言至元十一年春奉訓大夫前尙書省宣使鄭公奉  
朝命來守是郡按今州志有元知州鄭公關其名云至元



間以尙書省宣使守解州清白整肅勸農興學吏民從化  
嘗祈雨有應祀名宦又云我朝統一之後西場弗置鄭公  
謀於眾而復之運城志元西池二場曰紫泉曰會商又解  
州志近州者爲西池釋碑所云則西場之復自鄭公始唐崔  
敖頌碑陰已有紫泉場卽西場校元尙書省不常置百官志至元七年立  
尙書省八年罷鄭公以至元十一年守解已在罷省後三  
年故曰前尙書省宣使奉訓大夫從五品亦見百官志